


Ni Presidente
Thomas S. Monson



“Kas Panagayatko Kadakayo”

Sumagmamanon a tawen iti napalabas maysa a gayyem nga agnagan iti Louis ti nangestoria kaniak maipapan ti pakasaritaan ti nadungngo ken naalumamay nga agsasao nga inana. Idi pimmusay ti inana, awan naibatina a kinabaknang a kuarta kadagiti babbaro ken babbalasangna ngem ketdi patawid a kinabaknang iti pagtuladan, iti panagsakripisio, iti panagtulnog.

Kalpasan a naibalikas dagiti pamunpon a pammadayaw ken ti naliday a pannagna a nagturong iti sementerio, inurnos ti familia dagiti sangkabassit a sanikua a nabati ti inada. Kadagitoy, natakuatan ni Louis ti surat ken tulbek. Inpatuldo ti surat: “Iti akinsuli a kuarto, iti kaba-baan a drawer ti dresserko, adda bassit a kahon. Linaon daytoy ti gameng ti pusok. Daytoy a tulbek ti manglukatto iti kahon.”

Nasdaawda amin no ania ti adda iti inada a napnuan pateg tapno idulin ken tulbekanna.

Naala ti kahon manipud iti talimengna ken naannad a naluktan babaen iti tulbek. Bayat ti panangusisa da Louis dagiti linaon ti kahon, nabirukanda ti retrato ti kada ubing nga adda ti nagan ken petsa ti pannakaiyanakna. Idi kuan inruar ni Louis ti maysa nga inaramidna a valentine card. Iti nalaad, a kasla surat ti ubing, a nailasinna a kukuana, nabasana dagiti balikas nga insuratna 60 a tawenen ti napalabas: “Patpatgek a Nanangko, Ay-ayatenka.”

Limmukneng dagiti puso, naalumamay dagiti timek, ken naglua dagiti mata. Gameng ti ina ti agnanayon a familia-na. Ti tibkerna ket napundar iti pundasion ti “Ay-ayatenka.”

Ditoy lubong kadagitoy nga aldaw, awanen ti panagkasapulan ti pundasion ti nangnangruna nga ayat no di iti pagtaengan. Ken awanen ti rumbeng a pangbirokan ti

lubong ti nasaysayaat a pagwadan kadayta a pundasion no di kadagiti pagtaengan dagiti Santo iti Ud-udina nga aldaw a namagbalin iti ayat a biag ti familiada.

Kadatayo nga agtakder a disipulo ti Mangisalakan a ni Jesucristo, intedna daytoy naiget a pangiturong:

“Maysa a bilin a baro ti itdek kadakayo, Tapno aggiinnayatkayo iti maysa ken maysa; kas iti panagayatko kadakayo, kasta met aggiinnayatkay koma iti maysa ken maysa.

“Gapu itoy mailasindanto a dakayo ti adalak, no adda ayatyo iti maysa ken maysa.”¹

No agtungpaltayo iti bilin nga agayat iti maysa ken maysa, nasken a kalinnangentayo ti tunggal maysa nga addaan-asi ken respeto, ipakita ti ayattayo kadagiti innaldaw a pinaglilinnangen. Mangidiaya ti ayat iti naasi a balikas, naanus a sungbat, napudno nga aramid, lapayag a mannakaawat, mammakawan a puso. Iti amin a panakilangentayo, dagitoy ken ti dadduma pay a kababalin ket makatulogto a maipakita iti dadduma ti ayat iti puspusotayo.

Ni Presidente Gordon B. Hinckley (1920-2008) napaliwina: “Ti ayat . . . ket maysa a banga ti balitok iti murdong ti bullalayaw. Ngem nalablaves pay daytoy ngem iti murdong ti bullalayaw. Ti ayat ket adda pay iti pangrugian, ket dita ti pagtaudan ti kinapintas a naiyuntay iti tangatang iti agbagbagyo nga aldaw. Ti ayat ti talged dagiti agsangit nga ubbing, ti araraw dagiti agtutubo, ti pigket a mamagkappeng iti kallaysa, ken ti lana a manglapped ti riri iti pagtaengan, isu ti kappia iti panaglakay ken panagbaket, ti lawag ti namnama kalpasan ti ipapatay. Anian a kinabaknang dagiti agragsak iti denna dagiti familia, gagayyem, ti simbaan ken kakarruba.”²

Ti ayat ti kangrunaan a kaipapanan ti ebanghelio, ken kataknengan a kababalin ti kararua ti tao. Ti ayat ti sungbat dagiti agrigrigat a pamilia, dagit addaan sagubanit a komunidad, ken masaksakit a pagpagilian. Ti ayat ket maysa nga isem, maysa a payapay, maysa a napintas a masao, ken maysa a pammadayaw. Ti ayat ket maysa a sakripisio, serbisio ken di managimbubukod.

Lallaki, ayatenyo dagiti assawayo. Tratukenyo ida nga addaan dignidad ken panangbigbig iti pateg. Kakabsat a babbai, ayatenyo dagiti assawayo. Tratukenyo ida nga addaan dayaw ken pammaregta.

Nagannak, ayatenyo dagiti annakyo. Ikararaganyo ida, suruanyo ida, ken agpaneknekkayo kadakuada. Annak, ayatenyo dagiti nagannakyo. Pakitaanyo ida iti respeto, panagyaman, ken panagtulnog.

No awan ti natarnaw nga ayat ni Cristo, ibalakad ni Mormon, “awan pateg[tayo].”³ Ikararagko a sapay koma ta surotentayo ti balakad ni Mormon nga “agkararag iti Ama iti amin a kabaelan ti pusotayo, tapno maaddaan[tayo] iti daytoy nga ayat, nga impaayna iti amin a napudno a pasurot ti Anakna, ni Jesucristo; tapno agbalin[tayo] nga annak ti Dios; tapno inton agparang, agbalintayonto a kas kenkuana.”⁴

DAGITI NAGADAWAN

1. Juan 13:34-35.
2. Gordon B. Hinckley, “And the Greatest of These Is Love,” *Ensign*, Mar. 1984, 3.
3. Moroni 7:46; kitaen met iti bersikulo 44.
4. Moroni 7:48.

PANANGISURO MANIPUD ITI DAYTOY A MENSAHE

Isuronatayo ni Presidente Monson maipapan ti pateg ti panangipakita iti pudno a panagayat a kas ken Cristo, nangnangruna iti pagtaengan. Ibilangyo ti panangawis kadagiti sarungkaranyo tapno agguummong a kas pamilia ket paglilinnawagan dagiti wagas a pakaipakitaanda iti ad-adu pay nga ayat iti tunggal maysa. Mabalina nga allukoyendyo ida a pumili ti maysa kadagitoy a kapanunotan ken agaramid kadagiti plano a manggunod kadagitoy a kas maysa a pamilia. Kas pagarigan, dagiti miembro ket makaipaay iti nalimed a panagserbi iti sabali a miembro ti pamilia tunggal lawas. Mabalina nga awisenyo ida a mangutobto no kasano a ti panangikalikagumda a mangragpat iti panggepda a tunoyen ket mangpadur-as iti ayat iti pagtaenganda.

© 2017 ti Intellectual Reserve, Inc. Nailatang amin a karbengan. Naimaldit iti EUA. Pannakaanamongna iti Ingles: 6/16. Pannakaanamongna a maipatarus: 6/16. Pannakaipatarus ti *First Presidency Message, February 2017*. Ilokano. 97922 864

AGTUTUBO

Panagkararag para iti Kappia

Ni Sarah T.

Masansan a dumar-ay dagiti nagannak kaniak kadagitoy miting kalpasan ti misa, ket aywanak dagiti tallo nga addik a lallaki ken tulongak ida a mangisagana iti pangngaldaw—nupay masansan a managkuriro ken managbisbisinda. Masansan a no narugiandan ti agaapa, alisto a marisutko ti problema. Ngem no daduma narigat ti mamagkappia no narugianen ti kinna-bil gapu ta intulokko ti kinnabil.

Iti maysa a malem, napalalo a rigat dagiti addik ti agkakatunosan. Ti panangikalikagumko a mamagkappia ket ad-adda ketdi a nagparikut kadagitoy banag agsipud iti pannakaluksawko. Isu nga indatarkon ti bukodko a pangngaldaw ket insardengko ti panagsa-ok. Kamaudiananna, imbagak, “Agkararagak. Mabalina kadi nga agulimekkayo biit?” Idin a nagsardengda, dimmawatak iti pammendision para iti taraon. Sakbay a sinerraak ti kararag, innayonko, “Ket tulongannakami koma nga agbalin a mamagkakappia.”

Idi damona, kasla dida nangngeg ket rinugianda manen ti agkikinnabil. Masuronak ngem ammok a kasapulak ti agbalin a managayat ken natalna ta inkakaragak a maadaankami iti kappia. Kalpasan ti maysa a minuto, nariknak ti talna. Nanganak a di nagsasao iti ania man, ket in-inut a nagsardengda nga agkikinnabil. Ammok a ti kappia a nariknak ket ti sungbat ti simple a kararag. Inkakararagko ti agbalin a mamagkakappia, ket ti Amak a Nailangitan tinulongannak nga agtalinaed a natalna idi masulisogak nga agbugkaw. Ammok a napudno Isuna a mangted iti kappia kadatayo.

Agnaed ti nagsurat iti Arizona, USA.

ANNAK

Pudno a Gameng

Salaysay ni Presidente Monson ti estoria maipanggep ti maysa nga ina nga addaan iti naisangsangayan a kahon ti gameng. Idi luktan dagiti ubbing ti kahon, nabirokanda dagiti retratoda. Ti gameng ti ina ket ti agnanayon a pamiliana!

Ti pudno a gameng ket saan a balitok wenno al-alahas—daytoy dagiti tao nga ipatpategtayo. Asino dagiti ay-ayatenyo? Mangidrowing iti kahon ti gameng nga adda retratoda wenno dagiti nagan-da iti uneg ti kahon.



Ti Pannubbot ni Cristo ket Pakakitaan iti Ayat ti Dios

Nainkararagan nga adalenyo daytoy a material ken kalikagumanyo nga ammuen no ania ti ibinglayyo.

Pammati, Pamilia, Tulong

Ti pannakaawat nga inted ti Nailangitan nga Amatayo ti Bugbugtong nga Anakna tapno maaddaantayo iti imortalidad ken potensial para iti biag nga agnayanon ket mangtulong kadatayo a makarikna ti awan patinggana nga ayat ti Dios kadatayo. Ayayattentatayo ti Mangisalakana.

“Siasino ti mangisinanto kadatayo iti ayat ni Cristo? . . .

“Ta diak duaduaen, nga uray ni patay, uray ti biag, uray dagiti anghel, uray dagiti pagturayan, uray dagiti banbanag nga agdama, uray dagiti banbanag nga umayto,

“Uray ti nangato, uray ti nababa, uray aniaman a sabsabali a parsua, didatayto mabalin nga isina iti ayat ti Dios, nga adda ken Cristo Jesus nga Apotayo” (Taga Roma 8:35, 38-39).

Maipapan ti Pannubbot ni Jesucristo, ni Elder D. Todd Christofferson iti Korum Dagiti Sangapulok-ket-dua nga Apostol kinunana: “Ti sinagaba ti

Mangisalakana sadiay Getsemane, ken ti saem a nariknana iti krus ti mangsubbot kadatayo manipud iti basol babaen ti panangted kadagiti kiddaw nga ipaay ti hustisia kadatayo. Mangted Isuna iti kaasi ken pammakawan kadagiti agbawaw. Bayadan pay ti Pannubbot ni Cristo ti pautang ti hustisia kadatayo babaen ti panangpalaing ken panangsupapakna ti ania man a sagsagabaentayo. “Ta adtoy, intu-redna ti rigat ti amin a tao, wen, ti rigat ti amin a sibibiag a naparsua, lallaki, babai, ken ubbing a padapada, a kameng ti kaamaan ni Adan’ (2 Nephi 9:21; kitaen met iti Alma 7:11–12).”¹

Ni Cristo ket “imburikna[tayo] iti dakulap dagiti Im-imana” (Isaias 49:16). Ni Linda K. Burton, Sapasap a Presidente ti Relief Society, kunana, “Ti kangatuan a tignay ti ayat ket tay mangiturong iti tunggal maysa kadatayo nga agparintumeng ken sipapakumbaba nga agkararag

tapno agyaman iti Nailangitan nga Ama iti panangipategna unay kadatayo ta imbaonna ti Bugbugtong ken naan-anay nga Anakna tapno agsagaba para kadagiti basbasoltayo, dagiti ladingittayo, ken amin a di naimbag kadagiti bukodtayo a biag.”²

Mainayon a Nasantuan a Kasuratan ken Impormasion

Juan 3:16; 2 Nephi 2:6–7, 9; reliefsociety.lds.org

DAGITI NAGADAWAN

1. D. Todd Christofferson, “Redemption,” *Liahona*, Mayo 2013, 110.
2. Linda K. Burton, “Is Faith in the Atonement of Jesus Christ Written in Our Hearts?” *Liahona*, Nob. 2012, 114.

Ibilang Daytoy

Kasano a mayebkastayo ti kinamanagyaman ken ayattayo iti Dios ken ni Jesucristo para iti sagut ti Pannubbot ti Mangisalakana?